

Sinerissap qanittuani qaleralinniarneq pillugu Namminersorlutik Oqartussat nalunaarutaat nr. 11, 28. august 2014-imeersoq

Aalisarnej pillugu Inatsisartut inatsisaanni nr. 18, 31. oktober 1996-imeersumi, ilaatigut Inatsisartut inatsisaatigut nr. 5, 21. maj 2002-meersukkut allanngortinneqartumi, kingullermillu Inatsisartut inatsisaatigut nr. 12, 13. december 2012-imeersukkut allanngortinneqartumi § 10, § 10a, § 13, imm. 2 aamma imm. 3, § 23, § 33, imm. 1, nr. 3 aamma imm. 2 aamma § 34, imm. 3 naapertorlugit aalajangersarneqarpoq:

Atuuffia

§ 1. Sinerissap titarnerullu aalisarnikkut oqartussaaffiup tunngaviusumik killingata 3 sømilinik avataaniittup akornanni angallatit 75 BRT/120 BT-mit mikinerusut atorlugit inuussutissarsiutigalugu qaleralinniarnermi nalunaarut atuuppoq.

Nassuiaatit

§ 2. Sinerissap qanittuani qaleralinniarnermi aqutsiveqarfii ukua aalajangersaavigineqarput:

- 1) Aqutsiveqarfik Upernavik, nassuiarneqartoq 71° 30'N avannaanit 75° 00'N kujataanut imartami sinerissamiit aamma titarnerup aalisarnikkut oqartussaaffigisami tunngaviusumik killigititamit 3 sømilit avataanut.
- 2) Aqutsiveqarfik Ummannaq, nassuiarneqartoq 70° 30'N avannaanit 71° 30'N kujataanut imartami sinerissamiit aamma titarnerup aalisarnikkut oqartussaaffigisamut tunngaviusumik killigititamit sømilit pingasut avataanut. Kisiannili 70° 30'N kujataani taamaallaat Ikerasaap Sulluani Qarassallu Imaani aalisartoqarsinnaavoq. Aammattaaq 71° 30'N avannaani kangerlunni aalisartoqarsinnaavoq, kangerlunni ukunani: Karrat, Kangilleq, Inngiata Kangerlua, Ukkusissat Kangerluat, Kangiussap Imaa, Umiiviup Kangerlua aamma Nuugaatsiap tunua.
- 3) Aqutsiveqarfik Qeqertarsuup Tunua, Qeqertarsuup Tunua nassuiarneqarpoq 68° 52,5'N avannaanit 70° 30'N kujataanut imartami sinerissamiit aamma titarnerup aalisarnikkut oqartussaaffigisamut tunngaviusumik killigititamit sømilit pingasut avataanut
- 4) Kalaallit Nunaata aqutsiveqarfii nr. 1-3-mi taaneqartut avataanniittoq aqutsiveqarfimmik Kalaallit Nunaata sinneranik taagorneqassaaq

Inuussutissarsiutigalugu qaleralinniarnermi angallatit

§ 3. Aqutsiveqarfinni Upernavimmi, Ummannami, Qeqertarsuullu Tunuani angallatit 19,99 BRT / 31,99 BT-mit anginerusut atorlugit inuussutissarsiutigalugu qaleralinniarnissaq akuerisaanngilaq.

Akuersissutit, pisassiissutit aqutsiveqarfilla

§ 4. Angallatit 6 meterimik (tamarmiusumik takissusia) taannalu tikillugu angissusillit atorlugit imaluunniit taanna ataallugu angissusilinnik inuussutissarsiutigalugu qaleralinniassagaanni, tamatumunnga akuersissummik peqarnissaq piunasaqaataavoq.

Imm. 2. Angallatit 6 meter sinnerlugu tamakkiisumik angissusillit atorlugit inuussutissarsiutigalugu qaleralinniassagaanni, tamatumunnga akuersissummik peqarnissaq piunasaqaataavoq. Akuersissummi angallatit FTJ-normullit imaluunniit GR-normullit suut atorneqarniamersut allanneqassaaq.

Imm. 3. Imm. 1 aamma 2 naapertorlugit angallatip angissusaa nalornissutigineqartillugu angallatip angissusaa pillugu nutaamik uuttortaasoqareerpat Aalisarsinnaanermut Akuersissutinik Nakkutilliisoqarfik aalajangiissaaq.

Imm. 4. Angallammut 6 meter sinnerlugu imaluunniit inorlugu tamakkiisumik angissusilimmuut akuersissut aamma qimusseq atorlugu qaleralinniarnermut atorneqarsinnaavoq.

§ 5. § 2 naapertorlugu aqutsiveqarfinni sisamani sinerissamut qanittumi qaleralittarineqarsinnaasutut pisassiissutit ukiut tamaasa Naalackersuisut aalajangersartassavaat uumassusilerinikkut siunnersuineq tunngavigalugu.

Imm. 2. Aqutsiveqarfii Upernavik, Uummannaq Qeqertarsuullu Tunua eqqarsaatigalugit angallatinut 6 meter sinnerlugu tamakkiisumik angissusilinnut aamma angallatinut 6 meter taannaluunniit inorlugu angissusilinnut immikkut pisassanik aalajangersaasoqassaaq.

§ 6. Sumiiffinni ukunani pisat § 5 naapertorlugu pisassiissutininut ilaangillat:

- 1) Sumiiffimmi nassuiarneqartoq 71° 30'N avannaanit 72° 30'N kujataanut kiisalu sumiiffimmi nassuiarneqartoq 73° 52,5'N avannaanit 75° 00'N kujataanut Aqutsiveqarfik Upernavimmi.
- 2) Sumiiffimmi nassuiarneqartoq allorniusat ammukaartut 52°30V kitaani aqutsiveqarfik Uummannami.
- 3) Sumiiffimmi nassuiarneqartoq allorniusat ammukaartut 51°30V kitaani aqutsiveqarfik Qeqertarsuup Tunuani.
- 4) Sumiiffimmi nassuiarneqartoq allorniusat aammukaartut 51°00V kangiani Ilulissat Kangerluani aqutsiveqarfimmi Qeqertarsuup Tunuani pisat qimussimik pisaallutillu assartorneqarpata.

§ 7. Angallatit 6 meterisut tamakkiisumik angissusillit taannaluunniit ataallugu angissusillit atorlugit qaleralinniarsinnaanermut akuersissutinik ukuninnga tunniussisoqartassaaq:

- 1) Aqutsiveqarfinni Upernavimmi, Uummannami aamma Qeqertarsuup Tunuani piffissami killiligaangitsumi pisassat qaffasinnerpaaffissalerlugit aalisarsinnaanermut akuersissutit tunniunneqartassapput

2) Aqutsiveqarfimmut Kalaallit Nunaata sinneranut aalisarsinnaanermut akuersissutit sivisunerpaamik ukiumik ataatsimik killilerlugit tunniunneqartassapput pisarineqarsinnaasullu qaffasinnerpaaffissaannik qummut killiliinngitsumik

§ 8. Angallatinut 6 meterinik tamakkiisumik angissusilinnut taannaluunniit ataallugu angissusilinnut qaleralinniarnissamut akuersissutit makkua tunniunneqartassapput:

1) Aqutsiveqarfimmi Upernavimmi, Ummannami aamma Qeqertarsuup Tunuani akuersissutit piffissamik killilerlugit pisassallu tamakkiisumik qaffasinnerpaaffissalerlugit aalisarsinnaanermut akuersissutit tunniunneqartassapput.

2) Aqutsiveqarfimmi Kalaallit Nunaata sinneranut akuersissutit piffissamik killilerlugit tunniunneqartassapput aalisarneqarsinnaasullu qaffasinnerpaaffissaannik qummut killiliinngitsumik.

Imm. 2. Akuersissutit imm. 1 naapertorlugu sivisunerpaamik ukioq ataaseq atuuttussatut tunniunneqartassapput

§ 9. Aqutsiveqarfimmi Upernavimmi, Ummannami aamma Qeqertarsuup Tunuani qaleralinniarnissamut akuersissutit aqutsiveqarfimmi taaneqartuni tamani atorneqarsinnaapput, kisianni aqutsiveqarfimmi Kalaallit Nunaata sinneranut pinnani.

Imm. 2. Aqutsiveqarfimmut Kalaallit Nunaata sinneranut aalisarsinnaanermut akuersissutit taamaallaat aqutsiveqarfimmi Kalaallit Nunaata sinnerani atorneqarsinnaapput.

Inuussutissarsiutigalugu qaleralinniarnermi piniutit atorneqartut

§ 10. Qassutinik qalorsuarsorlunilluunniit inuussutissarsiutigalugu qaleralinniarneq inerteqqutaavoq.

Imm. 2. Kommunit ileqqoreqqusaliaanni imm. 1-imi immikkut akuersissuteqarsinnaanermut malittarisassanik erseqqinnerusunik aalajangersaasoqarsinnaavoq, taamaalilluni aalisarfimmi killilersorsimasuni qaasusersorluni aalisarnissaq akuerineqarsinnaatillugu.

Imm. 3. Taamaattorli Aalisarnermut, Piniarnermut Nunalerinermullu Naalakkersuisoq aalajangiisinnavoq, imm. 2 naapertorlugu qassusersorluni aalisarneq piffissami aalajangersimasumi matuneqassasoq, tamanna pisassiissutitigut pissutsit pisariqartilerpassuk imaluunniit qalerallit tunisassiarineqarnerisa pitsaassusaat pitsanngortinniarlugu.

§ 11. Aalisarneq unitsinneqartillugu aalisartoq pisussaavoq atortumi qaqqinnissaanut pisariaqanngitsumik kinguarsaanani.

Imm. 2. Aalisartoq atortuminik annaasaminik ujaasinissamut pisussaaffeqarpoq.

Imm. 3. Aalisarnermut atortut piginnittup aqqanik najugaqarfianilluunniit imaluunniit angallatip aqqanik aamma angallatip normuanik nalunaaqutsersugaassapput.

Nalunaaqutsiinermi atortoq imermit allanngortinneqarsinnaasusannigilaq. Qassutinut nalunaaqutsiussaq qimiaaanut qullermut ikkunneqassaaq. Ningittakkanut nalunaaqutsiussaq

ningittakkanut ikkunneqassaaq. Nalunaaqutsiussat atorneqartut atortunut atorneqanngitsunut tamanut assingusumik ikkussorneqassapput.

Imm. 4. Qaleralinniarnermi atortoq atortunut allanut minnerpaamik 50 meterinik ungasitsitigillugu inissinneqassaaq.

Imm. 5. Atortut marluk ilarussimatillugit, nammineq atortut killorlugit ilarussimasut piiarneqartassapput.

Immikkut ittumik akuersissutit

§ 12. Aalisarnermut, Piniarnermut Nunalerinermullu Naalakkersuisoq § 4, imm. 1 aamma imm. 2 naapertorlugit aalisarnissamut akuersissummik piunasaqaammut immikkut akuersissuteqarsinnaavoq, Qaanaami najugalinnut nunaqarfiinilu, Illoqqortoormiuni nunaqarfiinilu kiisalu Tasiilami nunaqarfiinilu najugalinnut.

Pineqaatissiissutit

§ 13. § 3, § 4, imm. 1 aamma imm. 2, § 10, imm. 1, kiisalu § 11-imik unioqquutitsisoqartillugu, akiligassiisoqarsinnaavoq.

Imm. 2. Inuussutissarsiutigalugu qaleralinniarneq akuersissuteqarfiusup avataani ingerlanneqartoq tassunga ilanngullugu § 8-mik sumiginnaaneq, imm. 1 naapertorlugit akuersissuteqamani aalisarnertut isigineqassaaq.

Imm. 3. Qaleralinniarnermut akuersissummi atugassarititaasumik unioqquutitsisoqartillugu akiligassiisoqarsinnaavoq.

Imm. 4. Imm. 1-3-lu malillugit akiligassiinerit Kalaallit Nunaanni Pinerluttulerinermut inatsimmi malittarisassat naapertorlugit inatsisitigut attuumassutilittut isigineqarsinnaasunut akiligassiissutigineqarsinnaapput.


Atuutilersitsineq

§ 14. Nalunaarut ulloq 15. september 2014-imi atuutilerpoq.

Imm. 2 Peqatigitillugulu Sinerissap qanittuani qaleralinniarneq pillugu Namminersorlutik Oqartussat nalunaarutaat nr 2, 2 februar 2012-imeersoq atorunnaarsinneqarpoq.

Kalaallit Nunaanni Namminersorlutik Oqartussat, ulloq 28. august 2014.


Finn Karlsen


Jørgen Isak Olsen